



my
F

18685

as. mt



my
7



47-2035 REMEDES
SOVERAINS
POVR GVARIR CEVX
DE LA RELIGION PRE-
tenduë Reformée.

Deum timete, Regem honorificate r
pet. 2. vers. 17.

Par R. Pequet, Docteur en Medecine.




A PARIS,
Chez NICOLAS ROVSSET,

1622.

Avec approbation des Docteurs.

THE NEWBERRY
LIBRARY

2



REMEDES SOUVERAINS

POVR GVARIR CEUX DE LA
Religion pretendue Reformée.

Case

F

39

326

1622/69



E grand Oracle de la medecine
Galien, dit au li. i. de diet. in
acut. que pour proceder me-
thodiquement à la guarison
de quelque maladie, il faut
premierement cognoistre la
cause du mal, puis en dire l'é-
uenement, tiercement met-

tre la main à la Cure.

Ie recognois en ceux de la Religion pretendue
deux grandes maladies lesquelles sont essentielles à
quelques vns des-leurs, & aux autres sont acciden-
telles, i'appelle essentielles qui sont de pere en filz
par succession, accidentelles, quand ceux qui ont
esté nourris long temps dans l'Eglise Romaine se
iettent parmy eux.

Ces deux maladies tirent leur source & origine du
defaut de la crainte de Dieu, & du peu de respect &
d'honneur que ces Messieurs portent à nostre Roy.

Quand à la premiere maladie qui est le manque-
ment de la crainte de Dieu (à fin qu'ils ne s'imagi-
nent que ie leur vueille imposer & faire aceroire
qu'ils soient malades) Ie prouue par viues & poi-
gnantes raisons tirees des escrits mesmes de leurs

Archiministres, qu'ils en sont grandement affligez.

Ma premiere raison est, Ceux là n'ont point la crainte de Dieu qui destruisent la nature de Dieu, c'est destruire Dieu de dire qu'il y a plusieurs essences ou natures en Dieu. Or leurs Ministres principaux, Calvin & Beze mettent plusieurs essences & natures en Dieu, doncques Calvin & Beze destruisent la nature diuine qui doit estre, & est veritablement indiuisible, par consequent ils n'ont en aucune façon la crainte de Dieu.

Calvin dict aux Actes de Seruet, pag. 249. 258. 372. que le filz de Dieu a vne substance distincte de celle du Pere, & escriuant contre Valentin, dict que l'essence du Pere ne peut estre l'essence du Fils, si le Pere ne s'en priue entierement ou en partie.

Beze en sa confession de foy art. 2. La parolle de Dieu (dict-il) enseigne clairement que ceste essence diuine est distincte reellement, & à la verité, & eternellement en trois personnes, or est-il que distinguer reellement & à la verité quelque chose est la diuiser en plusieurs parties. Beze dōc a creu qu'elle n'estoit *una*, & *eadem numero*, donc Beze a destruit la nature Diuine.

Mais, bon Dieu, quelle meschanceté, que deuiendront ce que vous auez prononcé de vostre propre bouche, *Ego & pater vnum sumus*.

Que deuiendront ces axiomes de Theologie receuz de toute l'antiquité, à sçauoir qu'il n'eschoit en Dieu aucune diuersité ou composition, qu'il n'y a en Dieu aucun accident, ains que tout ce qui est en Dieu est Dieu mesme.

Mais quoy, ces Messieurs rapportent l'opinion des Arriens qui disoient que le filz de Dieu n'estoit pas

5

homousios, c'est à dire consubstantiel, de mesme nature & substance avec son Pere, mais qu'il estoit *homoiousios*, & *eterousios*, c'est à dire de nature diuerse & dissemblable. Nous refuterons en peu de mots & en passant ceste opinion diabolique par ce Psalme cent neuf, *Dixit Dominus Domino meo: sede à dextris meis*. Le Seigneur à dict à mon Seigneur, c'est à dire le Pere à dict au Fils, mettez vous à ma dextre, lequel tesmoignage est si puissant que les Iuifs au rapport de S. Mathieu c. 22. ne peuvent rien respondre à Iesus-Christ qui prouuoit sa diuinité par ce Psalme, d'où vient que ceste particule, *Dominus*, est prise pour Dieu le Pere, & ces mots (*Domino meo*) pour le fils. Or il n'y a point de doubte que le Roy Dauid n'eust esté auteur de ce Psalme: car si c'eust esté Melchisedech ou Eliezer seruiteur d'Abraham, comme ont voulu dire quelques Iuifs recens, leurs Peres n'eussent pas oublié ny obmis del'obier au Messie, & toutesfois il est dict au lieu preallegué de S. Mathieu, *et nemo poterat ei respondere verbum*, personne ne luy pouuoit rien respondre, joinct que l'auteur du Psalme, appelle celuy qui est signifie par ces mots (*Domino meo*) son Seigneur & Prestre selon l'ordre de Melchisedech, ce qu'il entend seulement de Iesus-Christ, comme l'enseigne l'Apostre en l'Epistre aux Hebreux ch. 7.

Nous recognoissons doncques par là que ces deux Heresiarches ont tiré ceste doctrine abominable de cest auorton d'Enfer Arius: mais il ne s'en faut point estonner, d'autant que leur religion n'est autre chose qu'un amas, ou pour mieux dire un esgoust & une Cloaque de toutes les antiennes heresies, sans m'estendre sur icelles (car il faudroit des volumes en-

riers pour les descrire toutes) ie me contenteray d'en coucher icy quelques vnes.

Premieremēt ilz ostent la liberté à l'homme comme faisoit Simon le Magicien, Valentin, & les Manicheens.

Ilz disent que Dieu est autheur & instigateur de tous les pechez, & que tous les maux se commettent par la force du decret & de l'ordonnance diuine, Florinus, & Simon disoient le mesme.

Ilz enseignent que les bonnes œures ne sont aucunement necessaires à salut, & que la foy suffit, les Eunomiens l'auoient enseigné enuiron l'an de grace 360.

Caluin nie la presence reelle du corps de IESVS-CHRIST au sainct Sacrement de l'Eucharistie, le mesme nioit deuant luy Berengarius, enuiron l'an 1051.

La seconde raison par laquelle ie monstre qu'ilz n'ont point la crainte de Dieu, c'est qu'ils laschent la bride à toutes sortes d'abominations, avec non moins de licence que ne feroit l'Atheïste, car s'ils se donnent vn priuilege que nul peché tant soit il enorme ne leurs soit imputé, ny quand ala coulpe, ny quand à la peine qui les empeschera (ie vous prie) de se laisser aller à toutes sortes de malice: sera-ce l'Enfer? ils ne le craignent point, le Purgatoire? ils n'en veulent point, rien de tout cela ne peut preiudicier à la foy de ces deux grands reformateurs Luther & Caluin, que sera ce donc? la subtraction peut estre de la grace de Dieu, mais il ne leur oste iamaïs, sera-ce le courroux de Dieu? il ne peut se courroucer contre les hommes iustes & fidels, à

cause (disent-ils) de la satisfaction de Iesus-Christ, ce sera donc la satisfaction temporelle pour la Confession des pechez: encore moins: car tout cela est aboly en leur endroit comme superstitions vaines, & friuoles, il n'y a doncques nulle plus grande occasiō de craindre parmy eux qu'en l'Atheisme.

La troisieme raison, c'est qu'ils disent que les bonnes œuures ne sont pas necessaires à salut.

Luther dict ces parolles, *li. de 10. praecep. c. 1.* pour ma part ie ne donneroie pas vne maille de tous les merites de S. Pierre afin qu'il m'assistast, puis qu'il ne peut s'ayder soy-mesme, & que tout ce qu'il a il le tient de Dieu par la foy de IESVS-CHRIST, par là il dict que la foy seule de Sainct Pierre a remporté la couronne & gagné le pris de la gloire.

Le mesme dict qu'il est impossible d'establiir les bonnes œuures, sans esbranler la foy laquelle en matiere de iustification est diametralemēt opposée aux œuures, d'où il s'ensuit (dit-il) que la doctrine des bonnes œuures est doctrine du diable, & vn departement de la foy.

Caluin tient ces discours, *lib. 3. Instit. c. 11. §. 13.* la iustice des bonnes œuures ne peut aucunement compatir avec la iustice de la foy, & non pas seulement les œuures faictes par les seules forces de la nature, mais aussi toutes les autres, quelque couleur ou tiltre que vous leur puissiez donner sont forcloses par la iustice de la foy.

Luther dit, *In resol. contra Eckium*, que le iuste offense Dieu en chaque bonne œuvre. A ce poison & venin i'oppose briefuement ceste Antidote & contre-poison, mes freres, dit S. Iacques *c. 2. v. 14.* Que

profitera-il si quelqu'un dit qu'il a la foy & non les œuvres? la foy le pourra-elle sauuer? & au vers. 20. *Veux tu sçauoir ô homme vain, que la foy est oisue sans les œuvres, Abraham nostre Pere n'a il pas esté iustificié par œuvres en offrant son fils Isaac sur l'Autel?* & au vers. 24. *Vous voyez que l'homme est iustificié par les œuvres & non seulement par la foy.* Et vne infinité d'autres passages que l'on pourra voir dans la sainte Escriture qui prouuent infailliblement que les œuvres sont necessaires pour nostre iustification. Que si cela est, pourquoy ne rentrez vous au giron de l'Eglise Romaine, qui comme bonne mere vous receura à bras ouuerts, vous presentera ses mammelles pour vous faire gouter & succher le lait des consolations diuines. *Gustate & videte quam suauis est Dominus.*

Tertulian disputant contre les Gnotistes, commet est-ce, dit-il, qu'ils auront en la maison du Pere diuerses demeures, si ce n'est selon la diuersité des merites? comment sera vne estoille differente de l'autre en gloire si ce n'est par la varieté des rayons, c'est à dire des bonnes œuvres & merites.

Sainct Basile au sermon *de exercit. monastico*, à ceux qui gardent les commandemens appartient vne abondante recompense, sçauoir est le salaire copieux, ceste couronne de gloire.

S. Ambroise *lib. 3. epist. 23.* puisque l'escriture dit, le ieusne & l'aumosne deliurent du peché, qui sont donc ces nouueaux maîtres qui reiettent le merite du ieusne? & les autres Peres, comme S. Hylaïre sur S. Mathieu, S. Chris. S. Hieros. S. Aug. &c.

Le sieur du Moulin la dessus respondant à la 27. demande de ce grand flambeau de la compagnie de Iesus le Reuerend Pere Coton dit, Nous tenons (ce

sont ses propres paroles) que Dieu recompense les bonnes œuvres, mais de cela n'ensuit pas que les œuvres soient méritoires. Belle réponse pour le coriphé des Ministres, ie conclud au contraire & necessairement Dieu recompense les bonnes œuvres, selon du Moulin, donc elles sont méritoires, consequence aussi necessaire que qui diroit Monsieur du Moulin sçait ce qui presche estre directement contre la verité orthodoxe, dont il est grandement malicieux.

Car qu'est ce autre chose meriter qu'une action libre & volontaire, à laquelle on doit recompense selon iustice? si bien que merite & recompense sont termes correlatifs, en telle sorte que merite regarde necessairement recompense, & ny peut auoir recompense sans merites.

La quatriesme & dernière raison, c'est qu'ils font Dieu auteur de peché.

Caluin dit expressement *lib. 3. Inst. c. 18 §. 1.* que Dieu est auteur du mal de coulpe en ces termes, Dieu a esté l'auteur de ceste esprouue, parlât de Iob, & expose apres que le est ceste esprouue, disant, Sathan s'efforce d'inciter Iob à desespoir & rage cōtre Dieu. Or desespoir & rage contre Dieu, n'est-ce point vn tres-grand peché? Sathan en est le ministre, dit il, c'est à dire seconde cause & comme instrumēt, Dieu donc en estant la premiere cause il sera plus proprement & efficacement auteur du peché que Sathan, en tant que l'effect de l'instrument dépend plus de la premiere cause & principale, que de l'instrument mesme.

Mais quelle impieté se peut-on imaginer plus grande que de faire celuy auteur de peché, qui est le
Dieu

Dieu des iustes & des Saints, où sont tes yeux impie Calvin, lors que tu prononce ceste opinion infernale, toy qui fait profession des Escritures saintes iette la veuë dessus Sap. 14. *Dieu hait l'homme impie & son impieté.*

Au Psal. 5. *Tu es le Dieu qui ne veut point l'iniquité,* Psal. 14. *Dieu est saint en toutes ses œuvres,* en Osee c. 13. *Ta perdition est de toy ô Israel.*

Voila la cause & l'origine de la premiere maladie de ces Messieurs apres la cognoissance de la cause dit Galien tuit le prognosticq.

L'euenement de ceste maladie est grandement douteux pour eux, voire tout à fait sinistre s'ils ne viennent à resipicence, & à recognoissance, car ils sont au hazard de perdre le plus grand bien qu'on se puisse imaginer, à sçauoir la gloire.

Sus doncques pour l'entiere guarison de ce mal, outre les Antidotes susdicts proposez cõtre le venin de leurs Archiministres. Je suis d'aduis de leur tirer desvnguents precieux de l'Escriture sainte, dont ils se pourront seruir, ie dis de l'Escriture sainte, d'autant qu'ils sont tellement desgoustez qu'ils ne veulēt autre drogue, que de ceste boutique. Car en l'art. 5. de leur confession de foy, ils ne se soucient ny des arrests, ny des Conciles, ny des Edicts, ny des miracles, &c. Mais seulement de l'Escriture, qui est regle infailible de leur foy. Je les prie donc de cœur & d'affection de se seruir des remedes suyuant.

Premier remede.

I*nitium sapientiæ timor Domini.* Messieurs de la pretendue, si vous desirez auoir la sagesse, non point celle de la terre, car vous n'estes que trop sages mondains, mais bien la vraye & solide sagesse, il faut ne-

cessairement que vous ayez la crainte du Seigneur, il faut quitter l'erreur & embrasser la verité.

Second Remede.

M*Elus est parum cum timore Domini quam thesauri magni.* Mes amys ne vous trompez pas, c'est à vous que ie parle Ministres, qui malicieusement vous vousiettez dans ceste religion pour les biens, pour les femmes, pour les plaisirs du monde, sçachez qu'il vaut mieux peu auoir avec la crainte de Dieu, que de posseder les thresors du monde, qui ne sont que pures folies au regard des thresors inestimables du Ciel, sçachez qu'il vaut mieux estre pauvres ça bas pour quelque temps, pour estre à iamais riche de gloire dans le Ciel, pensez y, mais faiçtes que la raison domine sur vos sens, & qu'elle vous serue de phare & de flambeau, & non vostre sensualité qui vous fait faire banqueroute à Dieu, au Roy, & à vostre propre conscience.

Troisiesme Remede.

P*ertimorem Domini omnis declinat à malo.* Quand vne fois la crainte du Seigneur s'est logée dans vne ame, elle fuit le mal, elle embrasse le bien & ne cesse de soupirer apres Iesus-Christ, elle croit ce que luy propose l'Eglise elle ne demande ny de *quomodo* ny de *quare* ny de comment cecy, pourquoy cela, mais librement se soubmet à ces ordonnances.

Quatresme remede

T*imor Domini disciplina sapientie.* Il n'y à rien qui nous rende plustost sages tant que nous sommes voyageurs que ceste crainte, d'autant que par icelle nous sçauons comme il se faut comporter à l'endroit de Dieu & des hommes.

Cinquiesme remede.

T*Imor Domini fens vita.* Nous sommes morts sans la crainte de Dieu, car si elle est la source & la fontaine de vie en estant priués nous n'auons plus de vie, le peché est la mort de nos ames, n'auons nous point ceste crainte, nous nous laissons aller à toute sorte de pechez par consequent sans ceste crainte nous sommes morts.

Sixiesme & dernier remede.

I*n timore Domini fiducia fortitudinis.* Sans la crainte de Dieu nous sommes foibles & debiles, nous n'auons point la force de resister aux assauts violents des diables & de la chair, & ne faut point s'esmerueiller si les Ministres sont tellement plongez dans leur concupiscences, cest par ce qu'ils n'ont point de vigueur & de courage estant priuez de la crainte de Dieu.

Qu'ils sçachent donc ces Messieurs, pour conclusion de ceste premiere partie, que la crainte du Seigneur est tellement necessaire que le plus souuent venant à manquer est cause de grands defastres, d'ou vient qu'au 20. de la Genese, Abraham dit à Abimelech, *cogitauī mecum dicens, forsitan non est timor Dei in loco isto & interficiē me*, l'ay pensé à par moy, disant peut estre que la crainte de Dieu n'est pas en celieu cela estant sans doubte ils me feront mourir.

Qu'ils fassent comme les enfans d'Israël *Exod. 14.* lesquels apres auoir passé la mer rouge, & apres la submersion de l'armee Pharaonique, *timuit populus Dominum & crediderunt Domino & Moysi seruo eius.*

Ils commencerent à craindre Dieu, à croire au Seigneur, & à Moysen son seruiteur.

Qu'ils passent la mer rouge de leurs concupiscences & enseuelissement l'armee de leus dogmes opinastres dans la mer, c'est à dire dans les larmes & les a-

meritumes, disant avec le Prophete Royal, *Recogitabo tibi omnes annos meos, in amaritudine anime mea.* & alors ils entonneront avec Tobie ces belles paroles, *Multa bona habebimus si timuerimus Deum*, nous aurons des biens à foison si nous craignons le Seigneur.

L'autre maladie vient du peu de respect & d'honneur qu'ils portent à nostre Roy tres-Chrestien.

Ils disent en l'article 39. de leur confession de foy, ces parolles, il faut donc à cause de Dieu que non seulement on endure que les superieurs dominent mais aussi qu'on les honore & prise en toute reuerence, les tenans pour ses Lieutenans, & officiers lesquels il a commis pour exercer vne charge legitime & sainte.

Et en l'article 40. Nous tenons dōcques qu'il faut obeir à leurs Loix, & statuts, payer tributs, imposts & autres deuoirs, & porter le ioug d'une bonne & franche volonté, encores qu'il fussent infidels, & peu apres.

Par ainsi nous detestons ceux qui voudroient reietter les Superiorités, mettre communautez, & confusion de biens & renuerfer l'ordure de Iustice.

S'il est vray qu'ils croient de cœur, & d'affection, & sans faintise que Dieu est auther des Republiques, Royaumes & de toute sorte de principauté, pourquoy tant de fois ont ils pris les armes contre les Roys? mesprisé leurs Loix, & ordonnances, & suscité le peuple à rebellion en escriuant, & parlant mal d'eux? comme cest impie Calvin sur le 2. chap. de Daniel Vers. 40. Dict que tous les Empires qui seront au monde seront aduersaires de Dieu, & que tous les grands Roys & Monarques de la terre seront autant d'ennemis iurés & cruels.

Et sur le cha. 5. Vers. 21. dit combien qu'ils se vantent (parlant des Roys) à pleine bouche de regner par la grace de Dieu, si est-ce qu'ils mesprisent toute maiesté divine, d'autant qu'ils rauissent à eux la gloire de Dieu, voila quel est la rage & forcenerie de tous les Roys.

Sur le 6. chap. Vers. 3. nous voyons dit il és cours des Roys que les plus bestes sont les premiers & les plus aduencez, & apres, selon que les Roys sont presque tous hebetes & brutaux aussi semblablement sont ils comme les cheuaux & les aines des bestes brutes.

Est il possible d'inuenter, de decocher, & vomir plus d'iniures & de calomnies contre les Roys & magistras catholiques qu'a inuenté cest abominable Calvin qu'ils tiennent pour autheur de leur confession de foy? ne diries vous pas qu'il se moque quád en ces deux articles susdicts il veut qu'on croye qu'il faut obeir à leurs lois, statuts & ordonnances, payer tributs, Imposts &c. & neantmoins avec vne telle impudence & effronterie raualler la grandeur des Roys, & par le mal d'euz? ô impieté insupportable qui doit plustost partir de la bouche d'un Sathan que d'un homme.

Quel moyen plus expedient pouuoit laisser apres la mort ce detestable pour rendre les Roys tres-Chrestiens, & tres Catholiques odieux a leur subiects, que telle doctrine pernicieuse, & formellement contraire a la parole de Dieu? Si la premiere maladie est perilleuse celle-cy est aussi grandement à craindre, car de ne point se soubmettre au Roy, c'est ne se soucier pas de Dieu, de qui il est Lieutenant sur terre, & il y a vne telle dépendā-

ce entre craindre Dieu, & honorer le Roy qu'on ne
peut bien faire l'un sans l'autre.

Qu'ils recoiuent donques pour la guarison de ce
mal les antidotes & vnguens tout ensemble, tirez
de la mesme saincte Escriture, laquelle dit si expres-
sément qu'il faut obeyr aux Roys & aux Magistrats
qu'il n'y a rien de plus exprez.

En S. Mathieu 22. rendez à Cesar ce qui appartient
à Cesar, à Dieu ce qui appartient à Dieu.

Aux Romains 13. il n'y a point de puissance qu'elle
ne soit de Dieu, or ce qui vient de Dieu est bien or-
donné, pourtant celuy qui resiste à la puissance, il
resiste à l'ordonnance de Dieu, or ceux qui y resi-
stent acquerent la damnation, veux-tu ne point
craindre la puissance, fais bien & tu en seras loué,
que si tu fais malaye peur, par ce qu'il ne porte pas
le glaive sans cause, car il est le Ministre de Dieu pour
faire vengeance en ire de celuy qui fait mal, & pour-
tant sois subiect pour la necessité, non point seule-
ment pour lire, mais aussi pour la conscience.

S. Paul escriuant a Tite 3. dit, Exorte les d'estre
subiects aux Princes & Puissances, & de leur obeyr
& d'estre prests a toutes bonnes œuvres.

1 Petri 2. Soyez subiects à toute creature humaine,
pour l'amour de Dieu, soit au Roy comme au Supe-
rieur, soit aux Gouverneurs, comme a ceux qui sont
enuoyez de par luy.

Si pour excuse ils desauouent Calvin, pourquoy
embrassent ils avec tant de louange & d'affection
sa doctrine, & que ne le proclament ils seditieux
impie, & digne de mort, & ses liures digne de feu?
Ils croient que Dieu a mis le glaive en la main des
Magistrats pour reprimer les pechez, ils ont eu don-

ques subiect d'admirer vn long temps la clemence & de bon-
naireté de nos Roys , qui pour quelques bonnes considera-
tions ont toleré vne religion ennemie de la leur , que si a pré-
sent on leur veut faire effectuer leurs articles de foy, si on les
traite par le glaive, attendu leur oppiniastre rebellion, il ne
faut pas qu'ils le trouuent estrange.

Et pourquoy ne se soubmettront ils pas au Roy qui est tel-
lement l'Oinct de Dieu , & que le Docteur Angelique S.
Thomas dit que par l'onction de la sainte Ampoule le Roy
de France fait des miracles guarissant des escrouelles, cest
pourquoy le doctre Gerson le nomme le Roy spirituel en ter-
re, d'autant qu'il reçoit plus abondamment le S. Esprit qu'au-
cun prince du monde, outre plus il l'appelle seul prestre en-
tre tous les Roys, en signe dequoy il porte la Dalmatique,
qui monstre le rang qu'il a avec les Prestres del'Eglise.

Et pourquoy ne point s'assuiettir à vn grand Saül, qui par
l'onctiõ Royale doit estre admiré de tout ses subiects *nūc
Saul inter Prophetas?* com me vn autre Saül *nommé stat in medio
populi?* n'est il pas tousiours au milieu de son peuple, comme
le Pasteur soulageant ses brebis, comme le cœur viuifiant
ses subiects, & comme le Soleil eschaufant, & iettant ses
benignes influences sur tout son Royaume? Israel cogneut
que Saul estoit son Roy *quoniam non erat similis illis in omni po-
pulo* ya il quelqu'un semblable à nostre Roy, qui est la viue
Image du Tourpuissant, le temple, & la demeure du S. Es-
prit? qu'un chacun donc de ses subiects crie à haulte voix
viuat Rex, que si les rebelles se rendent opiniastres, c'est luy
qui par sa trompette sçaura bien faire crouler les forces d'une
Ierico, c'est vn autre Moysé, qui pourra tout de sa verge,
c'est vn autre Iosué qui renuertera tout de sa voix, *Prouerb. 8.
per me Reges regnant*, c'est moy, dit Dieu, qui fait regner les
Roys, c'est moy qui leur donne des victoires, c'est moy qui
les establit pour commander sur les nations de la terre.

Il faut (Messieurs de la pretenduë) que ie vous donne vne
potiõ cordiale, qui est le meilleur remede qui se puisse trou-
uer pour vous reueler de vos syncops & deffaillance spiri-
tuelles, la voicy

Descendite de Ierico in Hierusalem, sortez du desordre & de la
confusion, abandonnez ceste maudite Babilone qui vous en-
veloppe dans mille & mille obscuritez, & retournez en la

maison de Dieu l'Eglise Romaine, hors laquelle il n'y a point de salut.

Quand à nous autres Catholiques nourris dans vne meilleure eschole, c'est à nous de nous armer de prieres pour la conuersion de ces pauvres ames.

Mais sur toutes choses poussons ce vœux du profond de nos cœurs.

Grand Monarque du Ciel & de la terre, *in cuius femore scriptum est Rex Regum, & Dominus dominantium*, qui tenez dedans vos mains le sceptre Gallicane & qui auez tousiours eu soin particulier de l'Eglise Romaine, vous voyez maintenant les flots grondans escumans & qui s'esleuent cōtre elle de toute part, souuenés vous de l'assistance que vous luy aués promise, il est vray que l'innocence de nostre Roy est comme vne belle lumiere qui se fait voir à tout le monde, mais nous craignons, Seigneur, pour nos iniquitez, & confessons avec gémissemens que nos pechez ont mis diuision entre vous & nous comme dit le Prophete Esaie, mais grand Dieu il ne faut point exposer l'innocent avec le coupable

Nous ferons avec vous ce que fit Iacob iurant avec l'Ange, *non te dimittemus nisi benedixeris*.

Nous vous presenterons vostre Filz mourant sur le gibet de la Croix qui attestera le coup d'un Abraham courroucé. Vous voyez (Seigneur) ce ieune Roy, Roy tout innocent au milieu des alarmes, au milieu des cliquetis des armes & combats, pour vnir ce qui est des vny, punissez nous grand Dieu, mais protegez ce ieune Prince, donnez luy la force de soubmettre, & d'assuiettir à son sceptre les rebelles de son Royaume, afin qu'estans reunis, eux avec nous, & nous avec eux, nous chantions incessamment vos louanges, & que nous entounions tous d'un mesme cœur, & d'une mesme volonté ce beau verset. *Domine saluum fac Regem, & exaudi nos in die qua inuocauerimus te.*

FIN.

Approbation des Docteurs.

Nous soubs. signez Docteurs en la Faculté de Theologie de Paris, certifions auoir veu & leu exactement ce petit traicté intitulé, Remedes souuerains pour guarir ceux de la religion pretendue reformée, & ny en auoir trouué qu'il ne soit conforme à la foy Catholique, Apostolique & Romaine. Faict ce 23 iour d'Aoust, 1622.

N. BLAIRIE Vicaire General de Monseigneur d'Amiens.
F. A. DV FEV, Gardien des Cordeliers d'Amiens.

